


Éugèni PLAUCHUD

PANTAIÀGI



Digne

1891

Qu'ei brave de pantaieja
Lou sero, alounga dins un prat
Tout clafi de margarideto,
Quand lou grihet di sa cansoun
E que, dins toutei lei bouissoun,
Luse lou lume dei luseto.

Alor l'esprit fuge lou cors;
Et l'amo, partènt sènso eifors,
S'envouoro lindo dins l'espaci;
E, pu soudo que lou mistrau,
Mouonto, mouonto toujou pus aut
Par countempla les astre en fàci.

Ei mestresso de l'univers
Se vouo bouto tout à l'envers
En esclapènt souréu, planeto;
E pièi, s'aco fai soun plesi,
Repastènt tout à soun lesi
Lou bandi mai 'me sa baguelo.

Se sènte tant grando que Diéu.
E, de verai, se lou poudiéu,
Toujou 'n despart de la matèri,
La leissariéu se proumena
Dins lei mounde amount samena,
Par n'en destria toui lei mistèri.

E d'aquèu tèms, dins lei bouissoun,
Luse lou lume dei luseto,
E lou grihet di sa cansoun
Ou mitan dei margarideto.

Mai lou pantai duro toujou;
E l'esprit, quitènt lei luenchou
Ounte jugavo emé lei mounde,

S'arrèsto avans de prendre sou,
E ves, en planènt dins soun vou,
L'umanita que se marfounde

A metre forço avans que dre.
Alor éu agantènt lou let
Lou mando dedins la baranço.
Dou cop lou dre doumino tout,
La forço fuge de partout,
Ei bèn l'agi d'or que s'avanço.

E, goubejènt tout à soun grat,
Sa cargo d'aquéu bieu prei-fa
De douna la pas à la terro;
Fai de pouèto, fai de sant,
E de savènt, qu'en s'amusant.
En ce quiei marrit fan la guerro.

Coumo li a plu de maufatan
S'entènd plu rèn que rire e cant;
La terro meme es avenènto :
De partout roussien lei blad d'or,
Dei souco raio de tresor
Qu'es toupaso, ei rubis fan crènto.

E d'aquéu tèms, dins lei bouissoun.
Luse lou lume dei luseto,
E lou grihet di sa cansoun
Ou mitan dei margarideto.

E quand lou pantai vai soun trin,
L'amo s'arrèsto pa 'n camin,
De l'aveni vouo trouca l'oumbro,
Par saupre ce qu'arribara
Lou jou que soun cors passara
De la vido dins la mouort soumbro.

L'aveni, counsulta, respouond :
- Cregnei rèn! Enauro toun frouont,
 Ce qu'es esprit à tout resisto;
 As la vido, la gardaras,
 Es tiéuno, vai! pouos èstre en pas;
 La mouort!... qu saup meme s'eisisto?

Quand la matèri de tes ouos
Pouo pa peri, digo 's que vouos,
Amo! que tu sieguei mourtalo?
 Serié lou mounde revessa
 Lou sant e lou juste strassa;
 Co se pouo pa, siés eternalo.

Rèn se pèrde, Diéu lou vouo 'nsin,
Ce qu'es esprit pa mai qu'un brin
 De paio; mai tout se tremudo;
 E par tu, dins l'etarnita,
 Les pantai seran verita
 Eibarluganto e touto nudo.

E d'aquéu tèms, dins lei bouissoun,
 Luse lou lume dei luseto,
 E lou grihet di sa cansoun
 Ou mitan dei margarideto.

© CIEL d'Oc – Juliet 2011